

民國淮陰志徵訪稿卷之五

邑人 徐鍾令 採訪

故事志八

大事略一 巡幸

康熙二十三年十月聖祖南巡幸清口閱視河工十一月回鑾幸王公隄老埧口天妃閘武家墩

二十八年上南巡閱視南河

三十八年上南巡三月幸高家堰巡視黃河乃乘船出清口諭建挑水埧開王營陶莊引河

四十二年上南巡閱視河工諭建鮑家營引河並移

淮陰志徵訪稿

故事

建中河工於楊莊

四十四年上南巡三月壬寅渡黃河泊清江浦幸惠濟祠石工諭建惠濟祠王公堤二挑水埧四月回鑾幸高家堰閱河堤

四十六年上南巡幸閱河工二月壬寅駐清河縣運口

乾隆十六年高宗南巡閱視御埧木龍

二十二年春上南巡幸運河口諭築攔黃埧並築御埧於運口頭北埧之北

二十七年上南巡幸御埧增建木龍幸高家堰建甌

工

三十年二月上南巡幸清口增建木龍

四十五年二月上南巡親閱陶莊引河謁龍神祠幸

武家墩諭建石工

四十九年上南巡

淮陰志徵訪稿

故事

兵事略二 按吾邑兵事備載丙子志是後四

十年未見兵革今錄吳昆田集中

數則聊補舊志之略

辛酉六月四日捻匪自擾板浦後分兩股一竄新安鎮一竄沐陽竄新安者朱光庭游戎率兵堵剿竄沐陽者龔元鉞大令率練堵剿練董錢崇基陳遐慶從焉行至南岡猝遇賊接仗小挫崇基惧而走練丁皆走土人大恐乞余為之請兵余言於王漕帥晏大臣許以衡陽防兵三百同去五日衡陽防兵三百人至火鎗隊也帶兵官為吉慶慶連皆游擊六日與兩將

淮陰志徵訪稿

故事

約馳赴錢集相機進剿余先行兩將帥兵隨後起隊是日余至浦與山 兵備積甫大令議集團防河並飭徐本寬下鄉彈壓防止匪蠢動三更抵莊七日往官莊陳介堂所 知縣游騎已抵東營距官兵四里許火光大起官兵不至馳書促之日落後東營人來言與賊接仗狀賊極悍騎馬者多十五六歲人皆赤身不著袴下體紅布二幅如戰裙有一婦人著紅衣跨馬尤矯捷是夜介堂隨其弟善堂彥甫防夜集練守圍八日日出賊馬至官莊北路火起余與善堂登圍見戰馬四匹由東而西距圍數十步耳余將西赴

錢集候官兵善堂以賊馬既至徑行恐不得達渡河走南岸當無害余從其言步至河濱避亂者爭舟有擠於水者隨行勇丁十人擁余登舟始得渡沿河而西至錢集南岸渡口遇馳書促官兵人云官兵至徐家溜止矣余命其急至錢集以官兵即來告徧諭市人無恐余走徐家溜見吉慶二將責以不時進將誤事二將無言下令拔隊行時交已自徐家溜至錢集十五里隔南北兩六塘河止一船已破三百餘人渡時許渡後徐徐行遇樹陰輒止至北六塘河口衆兵不欲渡三令而後起既渡日已平西見數百人首蒙

淮陰志徵訪稿

故事

黃巾道旁立而視余疑之至公安局局董已散咸云集不可保使人徧覓得張萬隆雪村王守任禮臣屬以局務久之錢榮申保亭來叩以鑾坡何往則云携眷下懷去矣叩黃巾何人則云新募勇千人以集不可保遣之不散者四百人殆欲伺釁為亂也余憂之促其具食食官兵二更余與兩將始得食食既余商之兩將云寇已深夜間恐其來劫營查本集練勇尚存五百名命汎弁陳太安率以防夜命衆兵休息無解衣履軍器悉置左右三更後余方就寢展轉不成寐卧聽更聲四下忽一片聲響如雷曰殺妖衆兵齊

起列陣迎官兵在中練勇左右翼集東北有土梗我軍據之賊馬十餘匹往來游弈於就近放火時許賊大至馬百餘匹隨以步賊去我軍半里既而三面進由南面有河我軍背河而陣也進數武復止我軍屹然不動相持又一時賊譟而前我軍開火鎗擊一賊人馬並倒賊退須叟復進我軍開連環鎗擊傷馬賊三人賊悉衆來撲我軍鎗發如雨賊馬紛紛倒散而走我軍追之賊大奔時高梁徧野官兵初到路径不熟又賊衆我寡未敢窮追也遂收隊返至局局中無人門已鍵時交申矣集中皆渡河軍士素水漿不可

淮陰志徵訪稿

故事

得怒而渡河留之不可余亦隨以行日旰復至徐家溜探馬回報賊已去五十里外矣

辛酉

清江浦自被陷後市井蕭條人烟寥落文武官員十數駐紮其中一聞警信輒即遷移去秋萬邑侯泣任始議築圍工未及半新帥抵任駐節於斯不十日而擒賊來招集人夫晝夜興築汰黃堤上新土尺餘而擒賊大至十六日直逼王營大帥親督兵勇於石馬頭固守賊馬縱橫在目而人無去志時兵勇不過二

千耳

壬戌

二月六日賊渡鹽河來犯我軍迎擊之於黃河灘德

都統之馬隊見其衆也懼而退賊隨之直撲圍北門
民兵爭門人馬積壓成邱阜矣吳帥親督守備王靖
保開砲擊之賊退方賊之至也人心洶懼北圍人競
南奔過閘自相踐踏死者枕藉舟為之沉某大臣某
刺史倉卒還郡出南門為軍士訶止出東門得脫是
夜集兵士守圍去鎧止柝悄然無聲與慎台蓉堂巡
視遙見火兵漸遠賊其遁矣七日賊回竄衆興昨日
黃河灘之敗游擊黃國瑞所部戰甚力德楞額退黃
軍亦却失六人國瑞指楞額罵曰若為將而先退狗
彘耳今日黃軍尋六人得屍於灘哭舁而入得軍誚

淮陰志徵訪稿

故事

讓之黃怒即率衆鬥既成列矣大帥馳令急止之始
罷德軍之退也圍門閉楞額越牆而進守牆者刺之
不敢校人馬紛紛陷於溝事定出之有死者喪失人
馬百餘疑戰死也今日稍稍來蓋逸至寶應方歸也
自清江以東皆震山陽城門閉板閘居人盡淮關監
督奔於揚家廟帥幕有走者旋歸帥謂之曰君等受
驚矣十一日賊馬竄東坎而步賊仍踞衆興攜糧結
寨為久住計帥飭黃國瑞統帶砲船三十隻步兵五
百人馳赴桃源於河之東西兩岸安營以逼之十七
日黃國瑞在衆興擊賊勝之二十三日賊犯車橋龔

鎮軍耀倫王副將萬清表副將師功黃游戎國瑞率兵至國瑞出戰大捷次日賊繞道由涇口關復犯車橋國瑞整隊前耀倫力阻之而賊遂大逞先是耀倫等至車橋縱兵大掠居人避之一市為空怨兵同於怨賊也至是德國瑞而怨耀倫次骨賊之二次東竄也未至東坎而東坎練勇進擊之為賊馬所衝潰傷亡者千餘人賊由涇口竄車橋以下之潘家社居人紛紛投水賊救之得生者百餘人有某者賊所識也救之不及懊恨而去云賊此次東竄路徑皆甚熟悉盖上年來作奸細者多偽為傭販乞丐人不覺耳而

淮陰志徵訪稿

故事

麻車尤眾關市之譏保甲之行誠當今之急務也已二十六日黃國瑞連破賊壘殺賊甚眾賊北竄沐陽旋西竄由二三灣渡運河而去三月初八日賊馬闌入城子河浦圍南面嚴守復竄湖灘初九日賊竄順清河浦上集民兵守圍南路火光連綿二十里徹夜不息初十日賊竄岔河直抵楊家廟十一日賊竄平橋黃國瑞督兵截殺百餘人生擒五人送節轅正法兵勇炙其心肝食之云極美十二日國瑞擊賊於平橋勝之殺賊二千餘溺水死者不計其數十三日黃國瑞又擊賊於平橋奪獲牛馬數千殺賊千餘十五

日賊於寶應湖被困傷亡幾半由泥竄回武家墩國瑞復追擊之賊竄出成子河十八日漕帥以黃國瑞病飭龔耀倫追賊耀倫難之於順清河渡兵一晝夜而始畢既濟遙見回竄敗賊縱火綿亘十餘里火驚以為賊復來也逸而歸過順清河不暇問舟楫時許而畢蓋水本蹇裳可涉也於是浦人驚懼紛紛遷徙及次晨桃源報賊退信至而後定賊之竄平橋也黃國瑞敗之於湖壩而於堤頭扼其歸路帥飭耀倫紮營於運河東岸以防其渡耀倫至欲決河以灌之有止之者曰長河斷流則賊處處可渡是君濟賊也乃

淮陰志徵訪稿

故事

止居一日徧搜居民得雞鴨羊豕還郡而鴨尤多郡城鴨價大賤故有不打長毛打扁毛之謠帥聞其退也怒復飭使去適國瑞大捷賊棄牛馬徧河岸耀倫麾軍攫之急走歸浦以勝報國瑞惡其冒功遂亦棄賊而還

以上漱六山房札記

自皖賊之亂四鄉築圍皆為堅壁清野之計民賴以存苗沛霖既授首賊焰少息而粵賊賴汶光自杭州走廬州北竄草地還與皖賊合僧王追剿急至曹州為賊所乘及於難復熾賴汶光張中雨任柱皆驍悍剽疾百戰之餘蹂躪皖鄂秦豫間未幾中雨走關外

任柱賴汶光垂涎齊東饒富同治六年夏由安山穿運河而東犯登萊沿海大擾淮海戒嚴漕帥張公之萬調兵守六塘不足復益之以客兵先是東人防賊於運河東岸築長圍為屏蔽至是賊突而過督帥李公鴻章進師臨河命提督劉銘傳渡河擊之將以海濱為賊圍盡而殲之恐其他逸議於南運河岸清河山陽寶應境亦築長圍以為限知淮安府事章君儀林難其事言於漕帥張公公曰吾固守六塘也即六塘築圍可矣六塘河上承山東蒙沂諸山泉及徐州微山駱馬諸湖水至劉老澗分為南北兩河而總入

淮陰志徵訪稿

故事

於海北六塘河寬而深於是與督帥李公定計即南岸築長圍上至劉老澗下訖龍溝為桃源清河安東沭陽海州五州縣境凡長二百里有奇在清河者上自風土城下盡安東界長二十三里所漕帥兵萬餘督帥更助兵數千共得二萬人五里一營營兵五百凡四十營相連五里一砲台河內砲船百餘隻上下巡緝工興於九月初葺於十月終凡四十餘日雪虐風饕董其事者儀林也兵民合力版築之聲與賊壘相聞十月劉銘傳擊賊於贛榆大敗之任柱殪賊窮蹙思遁西有重兵不得過南境六塘游奕於沭陽西

者十餘日至十二月初一日忽不見火守河者以為賊北去也初五日雨連陰極冷河冰合初七日夜半賊從漆家渡逸出守其地者為客兵浙江道員李鎮南驚火而寤賊過大半矣河內砲船截擊後賊始反走賊馬陷河而死者數百過者萬人率僵凍有顛仆於道或入人家乞糲髮者勁虜尚三千人擁賴汶光南奔我兵追之且殺且降僅餘百數十騎至揚州之瓦窑鋪汶光騎蹶揚州守兵得之以獻置於法此股賊遂盡是役也人曰若不守六塘淮郡其殆哉易曰王公設險以守其國守可廢乎爰志於此以與圍砮

淮陰志徵訪稿

故事

相輔云

以上六塘河長圍記

咸豐庚申之亂吾淮微官之死事者以宿南通判沈鴻為最烈山陽丁柘塘晏作沈四糊塗行而序之曰咸豐庚申春正月晦逆捻直犯清江浦河督奔至淮城逆賊大肆焚掠清桃即日失陷宿南通判沈鴻獨不肯行懷印衣朝服坐侍冠來箕踞罵曰我天朝命官爾毛賊安敢犯我冠相與笑曰官皆變服逃走此必假官也沈探印示之罵不絕聲寇交刃支解群競拋瓠糜碎其尸其義烈如此沈山陰人道光辛卯舉人時人所稱沈四糊塗也詩曰

噫嘻乎袁浦之扼真糊塗上下相蒙燕巢幕天昏
地黑皆愚夫軍需乾沒入己囊纒纏博塞耽樽蒲
舞衣歌扇醉春宴銀花火樹恣歡娛逆氛豕突競
鬩散官僚鼠竄齊奔趨窖金納賄積不已緘滕扃
鑄賫盜胫昆岡玉石俱烈燄一朝化去飛青蚨大
吏糊塗優戲劇群吏糊塗釀錢輸鼎折覆餗一網
盡三禡鞶帶宮為瀦噫嘻乎清江繡壤成焦土摧
殘民命無子餘孽由自作不可追懵然豐蔀災牀
膚嗟哉糊塗乃若此翻以沈倅為模糊沈君臨難
被朝服堂堂司馬敢捐軀我為此詩表忠節清風

淮陰志徵訪稿

故事

百世羞頑懦君不見文仲之知不如寧子愚呂端
小事真糊塗世人乖巧乃失節惟有糊塗滓不汙
相傳賊未至時黃河南北每夜青燐徧野與人爭路
而行時謂鬼移家山陽高延第庚申紀亂詩曰
幕府春燈事最奢啁歌管雜鳴笳羽書旁午方
增戍軍國平安尚報衙白晝霾沙天雨泣青燐爭
路鬼移家漫言休咎非人事可恨檀公一著差
蓋氣機感召理亦固然回溯全盛之時靡侈相仍酣
歌恒舞父老傳聞猶見一時勝概自捻寇東來豪華
都盡盛衰之際詎偶然哉山陽曹應熊聞清江失守

詩曰

驚傳刦運到淮東
焚殺無端市井空
袁浦一泓河水赤
鉢山半壁火雲紅
奇兵豈是來天上
大帥真同在夢中
防堵年年成底事
孤軍二百了沙蟲
春燕年年戀戲場
羽書飛至只尋常
忘機人至堂棲雀
玩寇誰教室引狼
誤國實深還自誤
殃民如此豈天殃
馬蹄歷亂爭東走
州里猶然在醉鄉

淮陰志徵訪稿

故事

古跡三

故城鎮一

甘羅城 見丙子志淮流一勺有甘羅城懷古詩其序云據郡國利病書城在淮陰鎮北一里韓信釣處今考淮陰鎮城池立於晉穆帝時此城在鎮北或古遺跡未可知甘羅在淮事無考然甘羅為文信君使燕時年十二計秦併天下時羅三十餘志謂不得在此築城非也又云甘羅城即韓信城此城至元末尚堅好而明張羽清口詩則云甘羅城在南韓信城在東是二地矣明山陽馮一蛟雪後

淮陰志徵訪稿

故事

甘羅城對月詩荒城名字古曲曲抱河流英氣蜚千禩雄名付一邱樓烏驚冷月積雪動行舟萬頃玻璃色微茫水上浮

韓信城 見丙子志明楊茂有詩曰韓信荒城雉堞隳當時功業已成非假王本為安齊計躡足翻成赤族機草昧尚知尊漢主太平焉肯助陳豨至今淮水潺湲處猶帶哀聲送落暉

漂母岸 見丙子志唐崔國輔漂母岸詩曰泗水入淮處南邊古岸存秦時有漂母於茲飯王孫王孫初未遇寄食何足論後為楚王來誓欲報母恩事

跡遺在此空傷千載魂茫茫水中渚止有一孤墩
遙望不可到蒼蒼烟樹昏幾年崩塚色暮日落潮
痕古地多堙圯時哉不敢言向夕淚沾裳只宿蘆
州村

淮陰市 在古淮陰縣治內城久圯廢不可考今於
郡城府市口立淮陰市碑其實非是唐温庭筠贈
少年詩曰江海相逢客恨多秋風葉下洞庭波酒
酣夜別淮陰市月照高樓一曲歌宋蘇軾發洪澤
中夜遇大風復還詩有明日淮陰市白魚能許肥
可見丙子志卷三鄉鎮注

淮陰志徵訪稿

故事

清江浦 見丙子志徐州萬壽祺有詩曰千里清淮
一線橫濁河鼓浪未能平誅求西北無商賈轉漕
東南困水衡數遣黃門催白糈誰從鴻雁閱蒼生
往來盡屬悠悠者牽纜長堤自在行查慎行發清
江浦詩曰南來步步遠風霾川路晨征一倍佳竹
篷蒲帆渾不用櫓聲如雁下長淮編蘆縛荻聚成
堆大舸多從江外來試問老堤堤畔柳年年辛苦
為誰栽又明張世才晚入清江詩大河聊鼓棹風
颯草蕭蕭雲淨風啣日沙明岸泊潮前村漁火暗
比屋市聲囂漸喜松扉近鄉思半欲消安東程鑾

清江浦詩曰幕府雙旌迴人家二水中結廬多葦
箔入市半漁翁檉柳栽新枿帆檣度晚風禹功勞
至慮畚築未休工

王家營鎮 見丙子志海寧查慎行有秋杪重至王
家營詩曰十日征塵滯故鄉大河西北又嚴裝千
家轉徙留三戶萬柳榮枯在一霜斷岸無橋頻待
渡涸沙有犢尚犁荒驚心八月歸舟路夜下萑苻
百里黃又查嗣璫王家營詩曰五年三到三移渡
心折驚濤打岸聲莫問客行無定向主人身事亦

浮萍

淮陰志徵訪稿

故事

浪石鎮 見丙子志山陽孫讀有過浪石詩曰露氣
浸衣冷秋空碧影含疏林猶帶葉候僕早停驂馬
老眠孤樹僧貧募野庵荒村酒味薄過客幾曾酣
澗橋鎮 見丙子志海寧查慎行澗橋詩曰風色轉
河壩春光滿淮甸阪被菜花黃籬窺野桃蒨朝陽
出疎樹蘆屋烟中見饌無登盤魚戶有啣泥燕從
人問前路已近清河縣

三台墩 見丙子志乾隆府志墩為一邑之鎮治坐
中墩左右各一為之輔

瀆頭鎮 丙子志作瀆頭村元豐九域志淮陰縣有

十八里河洪澤瀆頭三鎮

十八里店 在淮陰舊城東十八里故名山陽范以
煦淮流一勺有十八里店懷古詩三絕而弁以序
曰魏忠壯公勝知楚州拒金人於清河中流矢死
其地在淮陰東名十八里店見言行錄而宋史作
十八里中金史作十八里口皆脫文也元豐九域
志又作十八里河新唐書地理志虹縣下云有廣
濟新渠開元二十七年采訪使齊澣開自虹至淮
陰十八里入淮當即此地詩曰戰壘秋高急暮流
軸轡銜接客維舟橫波鐵鎖寒明月疑有聯帆出

淮陰志徵訪稿

故事

渡頭其二曰淮口雲連清口雲斷頭今日識將軍
甘羅城上多明月土阜淒涼照短墳其三曰平沙
巨石遠回環飛渡偏能越此關遺議任教留葛萬
荒唐誰證大伊山

博成鄉 漢淮陰地漢書有馮無擇張章先後封博
成侯潛邱劄記博成淮陰鄉名今失所在

大義鄉 宋淮陰地有義婦李氏見徐節孝集丙子
志云今失所在按乾隆府志有大義鄉疑在即清

江浦南境

河南鎮 在舊志大河南明隆慶三年淮水旁出諸

家溝至河南鎮以合於黃河見河渠志今廢

訾家營 在舊治東數里舊志以為正迎淮口蓋在河北與今楊莊相近今廢

鮑家營 在訾家營下前臨大河與東之王家營相並一稱鮑家口明萬曆中河決鮑營今廢

駱家營 在舊治北二十里明萬曆中大河由此而東至河口會淮今廢

龜山鎮 在治西南丙子志失載今從光緒府志補

淮陰志徵訪稿

故事

署宅二

總督行署 俗稱行台咸豐十年燬光緒六年漕督黎培敬建尋改考棚光緒二十八年漕督陳夔龍設江北大學堂於此

清晏園 在舊提督署內西偏初康熙中河督駐節於此引流種樹以為行館命曰淮園乾隆十五年高斌修治之又於池北建荷芳書院三十年李宏督河更為亭於池心曰湛亭而通以板橋於是泉石花木之勝甲於表浦是後嘉慶五年吳璥任河督更名澹園尋又改為清晏國光緒之末漕督陳

淮陰志徵訪稿

故事

夔龍又改為留園園中有古藤年最久故東舍有紫藤花館之名錢塘表枚留別荷芳書院詩曰尚書官舍即平泉手闢清江十畝烟池水綠添春雨後門生來在百花前吟詩白傅貪風月問字侯芭感歲年三日勾留千度醉爭教賦別不潸然驪歌一曲柳千行荷葉離離尚未芳四面鶯聲啼暮雨半杆帆影過低牆籬芭門小花能護歌舞台高水自涼看取君恩最深處碑亭無數卧斜陽拓開粉壁換窗櫺收得春光入戶庭古樹獨當人面立遠山遙隔竹簾青箭抽金僕穿楊試曲按銀箏帶水

聽莫道夜深風轉緊要吹斜月上孤亭諸郎箇箇
似瓊枝握手風前有所思折柳自澆臨去酒攀花
難問再來期烏綠戀樹啼偏苦雲是還山見更遲
記取高陽池館地江烟江雨一題詩上元梅曾亮
海晏園西窗詩曰花嶼蕭疏露石棱朱欄碧檻影
層層西窗閒對成孤笑小鹿穿籬鶴試冰又曰獨
坐過清曉年華又欲終林昏鴉語雪枝穩鵲吟風
漂泊悲生事優閒且寓公吾廬終自好消息幾時
通兩人皆曾寓此見襍事盧氏莫惟寶荷芳書院
詩曰一年花事最關情曲徑長廊次取行十日不

淮陰志徵訪稿

故事

來新綠滿春風吹老鶉鴝聲

清口驛 見丙子志明胡儼有清口驛詩日夜渡清
河驛寥寥犬吠幽人家散虛落舟楫倚汀洲薄霧
浮空起長河帶水流悲歌何處發不覺動離愁

躍龍池 見丙子志一作滾龍池

步隲亭 詳丙子志山陽許汝衡步隲亭詩曰臨湘
本儒者譽擅江東彥授經方下帷督兵自麾扇誰
顯將相名三亭自昔建惆悵故城南斷橋烟草遍
王鼎元詩曰人去亭空暮草存誰尋遺跡到荒村
孫吳作相新持節衛子論交舊灌園麥飯一盤誰

白眼瓜田數畝歎青門漫言功業江東盛到此英雄也斷魂

寄寄亭 見丙子志明山陽金銑有寄寄亭詩曰自是東西南北人草亭寄在楚江濱嘯歌聊遣閒中趣吏隱全忘現在身滿院松陰驚午夢一簾花露惱晴春明朝受代朝天去笑問蓬瀛笑未真按寄寄亭出處舊志云在工部署內今按山陽詩徵引耆舊詩云程篁墩有次清江浦邵文敬吳文盛二主事邀飲寄寄亭詩又有寄寄亭記則專為邵作邵官淮安戶部分司寄寄亭蓋分司署中別館也

淮陰志徵訪稿

故事

據此則亭在戶部矣

清河舊縣署 見丙子志鄆陵劉漢藜清河署中詩曰小邑遙通海編氓僅百家四郊多斥鹵一境半荒沙署閣聞飛浪公庭見遠槎澤鴻猶未集極目野烟遮想見舊縣荒涼之狀又清施閏章書清河縣客舍詩曰疏烟寒照一荒村小邑無城野色昏久廢驛庭稀馬跡新營官舍總蓬門地連河岸漁家少草滿田園井稅存誰信江南此風景舟車絡驛不堪論

南昌亭 見丙子志注曰所在未詳按乾隆府志卷

二十八山陽縣下有南昌亭注曰治西三十五里
在故淮陰縣即韓信從亭長寄食處則此亭當在
今清江浦西五里也

秀淮亭 乾隆府治在故淮陰縣運河西今未詳

吳園 今久不存邑人王永熙吳園有感詩曰園扉
聞向大河開夜夜游人醉月來今日兒孫都老大
百花零落又重栽自注在清江堯仙曾祖所遺

按永熙字映庚乾隆辛酉拔貢官高要縣堯仙未
詳

隰西草堂 明季徐州萬壽祺故居丙子縣志僅載

淮陰志徵訪稿

故事

其名未詳所在茲據壽祺所撰負甕圖志考之在
今西城外普應寺東今已鞠為蔬圃矣圖志云既
脫難携妻子渡江北隱於山陽之浦西築廬治圃
號為隰西草堂自負甕妻徐子睿荷畚隨之灌園
以自給或時為人傭書春秋暇日引觴賦詩彈琴
自娛圃居陋巷中前後多牧豕人剥啄者少西鄰
普應寺時時曳杖入退院中與沙彌爭餘瀋也嗟
乎天下之大四海之廣所爭者不知何許人聖帝
明王忠臣義士此時皆不知何往數畝之內偃仰
食息苟活其中志足悲矣作負甕圖第五又壽祺

隰西草堂詩曰老病移淮市擔簦稱道民乾坤悲
晚歲山水憶前身芳草舟車路桃花秦漢人冥冥
射弋者雁羽在沉淪吳進過裏溝頭訪萬年少隰
西草堂故址詩曰路斷人迹稀草深何萋萋當日
萬夫子水木家荒甸與世隔塵囂幽處餘清韻我
仰濕西名到此水瀾漫菱蒲青刺波柳花白飛霰
草堂無復存伊人可想見茫茫烟靄間佇立一悼
歎吳寧謐過板廠西街訪萬年少隰西草堂故址
詩曰野水殘雲外沙門慧壽居此間留別業歲晚
伴樵漁地僻經過少年深巷陌虛夕陽空徙倚誰

淮陰志徵訪稿

故事

為一迴車按二詩訪地各別今俱不詳按山陽詩
徵引吳山夫云先生初避亂至淮結廬菜市橋之
西里許蒲汀柳岸雜居園丁漁戶即以隰西名其
草堂居未久人亦罕有知者後乃移居公路浦之
南村四方慕其名者漸接踵至隰西之名遂噪一
時今人但知其終老清江不知其始基實去吾廬
不遠也據此則草堂原有二處矣

南村 在隰西草堂之陽有南村記載於二遺民
集中並見丙子志

陵墓三

甘羅墓 乾隆府志甘羅城在舊淮陰城北相傳秦甘羅所築或云即甘羅葬處今按謂城為甘羅葬處之說出郡國利病書

漂母塚 見丙子志唐羅隱有漂母塚詩曰寂寂荒墳一水濱蘆洲絕島自相親青娥已落淮邊月白骨甘為泉下塵原上荻花飄素髮道旁菰葉碎羅巾雖然寂寞千秋魄猶是韓侯舊主人

總管墓 在治西南沙礮嘴今土人呼總管墓按邑志隋張齋官潭州總管疑即此

淮陰志徵訪稿

故事

吳王墓 見丙子志邑人石渠有吳王墓弔古詩曰中原割據走英雄王業終成五代功忠武當年書顯號精靈此地奠行宮石麟埋沒惟山遠寶劍消沉楚水空惟有昔時塵戰處夜深清口馬嘶風按郡國利病書墓在治西五十里唐楊行密封吳王嘗屯兵清河口此其葬處

張右史墓 在舊志即宋張耒也丙子志失載今據光緒府志補

博古墳 南城外一里土阜崇隆相傳為張弨力臣墓俗呼為骨董墳

鄉賢陸騰駿墓 在浪石 灣韓莊丙子人物志有傳

能仁國師塔 在慈雲寺後隴僧玉琳葬處也康熙乙丑禮部尚書苑平王熙為作銘曰洪惟世祖高帝聖德顯道彰於遐邇深仁厚澤洽於幽明妙智圓通與如來心印為一嘗命訪僧伽之行解圓證者與論向上宗旨於時有大禪師奉詔入京曰玉琳琇公蓋天隱磬山之子而臨濟三十一世孫也師諱通琇號玉琳常州江陰人族姓楊世父芳母繆氏皆與般若有大因緣師之生也母夢大士携

淮陰志徵訪稿

故事

童子自牖入寤而生師墮地敏悟夙成能語輒誦佛佛號坐常跏趺十五閱語錄參誰字疑情大發寢食俱廢晝夜徬徨空中因觸翻溺器有悟遂蟬蛻萬緣決意究竟大事時磬山修禪師方弘化荆溪爐鑄正赤師直造其席依止受其戒為侍者進則決疑請益立雪不移退則宴然凝神危坐達旦必欲見道乃已一日於一口吸盡西江水下瞥見馬祖用處不覺身心慶快曰佛法落吾手矣自此遇勘辦發語縱橫自如當機不讓無何辭歸省母磬山密囑徵信曰善自護持勿輕洩也師既歸江陰

益韜晦日放曠雲水間偶乘月汎小舟舉頭頓忘
迷悟如虛空玲瓏不可湊泊急就證天隱於武康
之報恩叩擊之次迎刃不留至掀案而出隱知其
透關歎曰此吾宗獅子兒也隱示寂遺命令師主
法席師不從避之凌霄峰絕頂時天龍業已推出
雖欲埋名烟壑而衆莫之許師不得已起應之開
筵之日黑白環繞者萬指莫不霑被化雨隨根沃
潤而去丙戌過大雄樂其山川幽寂就荒烟蔓草
蒼茅為屋有終焉之志然聲光外流遂羶者益衆
期年復成藪席是時天童方唱道東南其機鋒迅

利諸方無能抗者惟師以法門猶子後先角立應
機接物如疾雷破山龍泉出匣非真實證悟者不
能寬其縱奪之妙以故年甚少世出最早而握機
行令卷舒自由聞者莫不欽服焉順治戊戌世祖
皇帝聞師名遣使詔師己亥春應詔赴闕見上於
外朝慰勞優渥即命近侍送居萬善殿不時臨訪
道要一日問如何用工師曰端拱無為又問如何
是大師曰光被四表格於上下又問孔顏樂處師
云憂心悄悄皇情大悅命近侍傳語恨相見之晚
特賜號曰大覺禪師名香法衣之錫殆無虛日尋

以母未葬懇乞還山詔許之由內府金錢助之襄
事師受賜歸以十九飯僧放生而以其一助營塔
費凡畚土運石一一皆身自為之庚子秋復詔至
京禮遇尤渥進號大覺普濟能仁國師至臘月世
尊成道日命於京師阜成門外慈雲寺為千五百
僧說菩薩大戒又命作工夫說刊行之次年世祖
皇帝升遐師領大弟子作佛事七晝夜畢辭歸山
欽命遣官護送其寵榮稠疊近代無與同者師雖
遭際昌辰然性恬於榮利無毫髮矜重意既歸如
野鶴孤雲無所留碍會於潛天目師子正宗禪寺

歲久隕廢郡人順天少尹兆岵瞻戴君謂非師無
以舉揚宗風光輝祖席率衆延師居之遠邇學徒
聞風奔赴堂序殆不能容於頽垣敗壁中一彈指
間金輝碧明樓殿上插雲際而未嘗見其有所作
為善權之請師雖勉強一赴然旋思歸老舊林亦
未嘗久留也天性至孝十二歲即喪父得法後別
構草堂於報恩之側奉母居之躬進飲膳母歿斷
食禪定者七日行道不離殯次者三年先是師之
父振陵翁與受雲棲大戒深味禪悅臨終染衣自
度謂師兄弟不讀書即當出家母氏亦受罄山記

荊晚年離俗依師得悟世號為大慈老人蓋非積慶之家不能生此大士而師其全戒孝友陳睦州大慧臬之風豈非契經所謂五因緣中真友者耶晚年慈心益切不憚跋涉之勞意將窮搜泉石接引縛禪物外而不與塵世接者嘗歎曰趙州八十行脚彼何人哉乙卯春遂屏給侍飄然常往因觸熱渡江止於淮安清江浦之慈雲庵索浴說偈而逝時康熙乙卯八月十日也壽六十有二臘四十三弟子奉龕歸天目全身塔於東塢庵之後隴凡六座道場七會說法解結發覆妙具善巧雖沉迷

重障一遭鉗鎚胃索無不斷絕焦芽小草一蒙溉灌身心無不光潤得法弟子二十餘人皆能傳燈續命接席分輝者也師廣穎豐頤平頂大耳面白玉色目光炯炯射人宴坐如臨大眾故見者不威而懾一生不蓄私財即纖細供養亦不輕受嘗過青縣有苦行僧負斗麪設供隨舟行者數日師憐其誠為說法要即揮之使去終不納也每檀施至輒教以持歸放贖生命同於攝受雖膺紫衣之寵而服用不及恒僧既悟逸格之禪復兼人教修淨業五曾弟子從師持藥師琉璃光如來名號得度

不可算數皆謂師從彼世界應化來此方云余昔侍從內廷間立法席之後親覩師據獅子座舉明正法發轟雷掣電之機雖老叅宿學罔知所措既而關閉習靜龍象萃處一空而戶外不聞人聲至於廣廈細旃從容詔對語巧意圓窮極實際能助九重增長法喜一時貴近無不函香問道師於宏法外不發一言其善慧深厚如此是以緇素四衆罔不傾心馴至名德上聞於天寵被鴻名龍光赫奕則師豈非乘夙世願輪隨助聖人敷揚大化者乎謂之優曇鉢華千年一現良不誣也銘曰西來

淮陰志徵訪稿

故事

妙旨五燈分繼震動鏗錫厥惟臨濟國師嗣法三十一傳金輪御曆佛日中天兜率親升演說般若光燭大千聲施九野應機而出乘願以來心光內發樓閣門開西江一吸劈面全體布袋打失凡情盡死扁舟夜汎水月明融直入無見爍破虛空六坐道場大施政令凡聖皈依天龍恭敬顯號榮名自天之祐開土何心白雲出岫天目高峰上摩穹碧師錫振飛祖庭生色寶台珠網彈指立成世間何經何營蘆廬終宿曳杖江口起滅空幻我尚不有坐脫淮上遊戲自如死者誰隱現在吾

六十二年悄然無事居士勒石僅有半字

方上人塔 在漁溝延壽庵後塔柱石刻云道光二十六年孟秋建釋方智墓所也見釋道

琉球通事鄭文英墓 在王營彤華宮後偏相傳文

英奉使人貢道卒葬此墓前有斷碑久剝侈惟碑陰略可捫識中刻京都通事諱文英鄭公之墓旁刻乾隆癸丑十一月十四日卒凡二十二字

七女墓 在七堡張福口北黃河堤上有二塚一為二烈婦墓所一為五烈女墓所相傳咸豐中西捻犯境七人携手投七堡口水塘死因合葬焉七人

淮陰志徵訪稿

故事

為把總朱以陞妻趙氏其妹貞女吳作全妻陳氏其妹淑女善女又高同山女陳賢女至今稱之孔繼鏢墓 在城東南一里孫昭棠墓亦在焉丙子人物志有傳

祠宇四

淮陰侯廟 在淮陰故城淮水岸唐時即有之今山陽東南之廟乃康熙中知府徐恕重修非舊廟也唐殷堯藩韓信廟詩曰長空鳥盡將軍死無復中原入馬蹄身向九原還屬漢功超諸將合封齊荒涼古廟惟松柏咫尺長陵又鹿麋此日深憐蕭相國竟無一語到金閨宋梅堯臣淮陰廟詩曰漢家天下將廟古像公圭百戰自亡楚一時空王齊鄉人奏簫鼓舟子賽豚雞不改寒潮水朝平暮復低蘇軾淮陰侯廟記 龍之所以為神者以其善變

淮陰志徵訪稿

故事

化而能屈伸也夏則天飛動其靈也冬則泥蟠避其害也當嬴氏刑慘網密毒流海內銷鋒鏑誅豪俊將軍乃辱身汙節避世用晦志在鵠起豹變食全楚之祖故受饋於漂母抱王霸之大略蓄英雄之壯圖志吞六合氣蓋萬夫故忍恥胯下泊乎山鬼反璧天亡秦族遇知己之英主陳不世之奇策崛起蜀漢席捲關輔戰必勝攻必克掃強楚滅暴秦平齊七十城破趙十二萬乞食受辱惡足累大丈夫之功名哉然使水行未殞火流猶燬將軍則與草木同朽麋鹿俱死安能持太阿之柄雲飛龍

驥起徒步而取侯王噫自古英偉之士不遇機會
委身草澤名湮滅而無稱者可勝道哉乃碑而銘
之曰書軌新邦英雄舊里晦露朝翻山烟暮起宅
臨舊楚廟枕清淮枯松折柏廢井荒台我停單車
思人望古淮陰少年有目共覩不知將軍用之如
虎張耒淮陰侯廟詩曰千金一飯恩猶報南面稱
孤豈遽忘何待陳侯乃中起不思蕭相在咸陽雲
夢何須偽出遊遭讒猶得故鄉侯平生蕭相真知
己何事還同女子謀楊萬里過淮陰縣題淮陰侯
廟詩曰鴻溝祇道萬夫雄雲夢何須武士功九死

淮陰志徵訪稿

故事

不分天下鼎一生還負室前鐘古來大斃愁無益
此後禽空悔作弓兵火荒餘非舊廟三間破屋兩
株松自後元陳孚明楊基涂相蔡汝楠陳文燭歸
有光張如蘭袁宏道並有淮陰侯廟詩今不具錄
吳王廟 乾隆府志引嘉靖邑志云在老子山明永
樂六年重修今久湮沒

淮神廟 在清河舊治東二里乾隆府志引舊志載
明武宗南狩旋至徐州神著靈異上問衣紅衣者
何官神對曰清河淮神送駕至此因賜額春秋祭
焉正德三年重建按此廟今已湮廢

靈慈宮 明正統八年建祀天妃之神華蓋殿大學士楊士奇有碑見金石三按靈慈宮一稱鐵樹宮在禹王宮左嘉慶五年道光十七年重建今惟禹王宮存見丙子志明山陽沈森有遊靈慈宮詩曰水抱亭臺山抱樓淮千此是小瀛洲長橋橫泛千林月曲徑深藏萬壑秋風遞荷香來几席日薰花氣上簾鈎憑欄一眺欲飛去鳳吹仙音何處求張又顛有靈慈宮贈戴鍊師詩曰仙家樓閣倚層城碧殿朱欄映水明丹鼎烟消從鶴夢滄波雲起洽鷗盟春風竹籜冠裁就秋月松花酒釀成一醉長

淮陰志徵訪稿

故事

吟海仙曲空疑雲外步虛聲按靈慈宮有二一即郡城之天妃宮一在禹王台側曰鐵樹宮二詩俱未詳所指

泰山廟 河渠志明隆慶四年淮水溢自泰山廟至七里溝淤十餘里按七里溝在馬頭鎮運河東去馬頭二里本有泰山墩舊志謂其下有東嶽廟原文稱順治初建移七里墩未知即泰山廟否待考陰澤侯祠 祀清江浦河神耿公漕運遣官致祭見乾隆府志今久湮廢

福運祠 在清江浦東河廠祀漕河龍王見乾隆府

志今久廢

澤

顯應祠 在草灣明萬曆四年六月草灣河工成河

淮二水大漲而不浸城總河奏允建立河海淮三

神廟宇一所欽賜祠名遣官致祭見乾隆府志今

久湮廢

惠濟祠 見丙子志邑人張調鼎有惠濟祠詩曰橫

河編石砥長鯨香火崇台列繡楹南狩宮車雲日

麗內頒宸翰斗牛平春漕庾廩通吳會秋轉余皇

出漢京一鎮兩河嚴鎖鑰至今靈靄接蓬瀛

焚軀孝子吳從衆祠 在漁溝南

淮陰志徵訪稿

故事

附坊表

淮海文光坊 在文昌閣前

萬民攸賴坊 在豐濟倉大門之右

百穀斯登坊 在豐濟倉大門之左

陳肆辨物坊 在菜市

分地經市坊 舊在菜市口今圯

佑啟人文坊 在文廟之右光緒三十年為漕督

陸元鼎立

福祐江淮坊 在普應寺大門外

惠民坊 在松公橋南

迎恩坊 在松公橋北

松公橋坊 在橋北

去思坊 在牌樓口為漕督松椿立坊陰曰

來暮

澄流順軌坊 在裏河廳大門之左坊陰曰顧於

民晷今圮

宣力揚風坊 在裏河廳大門之右坊陰曰觀乎

水監今圮

浦惠粥廠坊 在慈雲寺東巷

春靄慈雲坊 在慈雲寺之左坊陰曰無疆壽域

淮陰志徵訪稿

故事

澤溥萬方坊 在慈雲寺之右坊陰曰壽佛宣慈

貞節坊 為王錫綬妻陳氏光緒十三年建

在忠義祠東

至大至剛坊 在西關帝廟大門之右

允文允武坊 在西關帝廟大門之左

中權表率坊 在游擊署大門之左今圮

上將韜鈴坊 在游擊署大門之右今圮

以上在城廂

孔節烈坊 為孔昭棗妻劉氏光緒十九年建

在徐家湖北

節孝百壽坊 在王家營鎮左曰節孝之門右曰

百壽之門光緒二十八年為壽婦莫方氏建

海東表率坊 在西埧分司署大門之左

淮北分齋坊 在西埧分司署大門之右今圯

節孝坊 在劉皮鎮東為陸卿九妻吳氏光

緒三十四年建

以上在鄉鎮

淮陰志徵訪稿

故事

寺觀五

檀度寺 據淮關志寺為明鄉人楊漢捨宅沙門祖
亨創建後人因係古刹衆姓相繼募化官民交助
增拓叢林淮海道宋統殷有記明山陽李天授檀
度庵詩曰萬木靜僧關空天坦步間燈遙雲外塔
梵動月中山孤鶴神何遠幽光意自閑夜深群籟
發秋與鳥聲還

清江道院 在陳恭襄侯祠之西成化十一年祠既
成乃建道院保取南京朝天宮提舉陸道靜為住
持率徒衆十人供奉香火知府韓邦問有記載金

淮陰志徵訪稿

故事

石中今惟祠存

慈雲禪寺 明萬曆四十三年建清雍正十三年詔
撥淮關銀照大叢林式興修建置香光地於阜寧
陳家浦凡三十八頃五十八畝零乾隆四年寺成
頒龍藏全部供奉二十六年僧實宗領呈外河石
碼頭攤地二頃五十畝三分零又由海神廟畫歸
田六十三畝以上均見淮關志咸豐十年寺燬於
兵同治元年住持僧靜修募資重建正定王耕心
有碑曰康熙十五年秋勅封大覺普濟能仁琇國
師擔簦行脚止於南山陽清江浦之慈雲庵八月

十日說偈趺坐而逝及世宗皇帝踐阼敬天勤民
厲精政教風化覃敷甲兵偃息四海九州服德畏
威罔不率俾十一年慨然念大法陵夷禪林凋喪
乃下詔訪大覺國師之裔於此高旻天慧禪師實
徹奉詔入京既進對契旨仍命還山倡教東南以
振宗風十三年復以清江浦慈雲庵為大覺圓寂
之所勅建叢林闢除道場用安雲水乾隆四年大
工告成是為慈雲禪寺此慈雲改庵為寺所由昉
也二十九年故江蘇巡撫陳文恭公宏謀移清河
縣治於清江浦於是寺隸清河縣境咸豐十年豫

匪南寢清河被陷寺燬於兵又二年穆宗中興海
宇既平萬姓安業寺住持靜修師以道場蕪廢引
為已憂乃矢志興復集資重建凡經營二十餘年
內自殿宇禪堂外及門庭施設莫不傑如翼如復
厥舊觀天龍皈依父老讚歎規模宏濶遂儕江淮
諸名刹盛矣哉我世宗皇帝以大權菩薩現帝王
身世出世間之學咸用奮興慈雲一庵以大覺駐
跡之故忽然湧現莊嚴及修羅創刦既頽廢矣靜
公復以篤志苦行不辭艱鉅赫然規復於後列聖
宏護之慈由以表現天人仰止之誠有所據依緣

起廢興之際非偶然也夫如來為一大事因緣出
現於世者何菩提是已能入菩提乃出生死此出
世之法之達道也是故依菩提以為佛事雖一香
一花一禮拜一文倡功德之量無不圓周法界如
大乘諸經所稱者是舍菩提以為佛事雖輪奐之
美上甲梵天土木之功橫被震旦亦無功德或致
詆訶如初祖達摩大師對梁武者是今慈雲禪寺
原於大覺創自世宗既依菩提為佛事矣而靜公
奮然興建上繼闕規意者壇坫既復大法因之益
顯亦未可知也昔天慧禪師既歸江東被命住磬

山聖月寺旋移揚州高旻宏道濟人鉗錘猛厲為
諸方冠此禪席所共聞也今靜公既擴選佛之場
吾知其必能遠宗大覺近師天慧開闢菩提自利
利他以為正覺龍象豈第以營度自畫忘佛祖之
心證適為達摩所斥已哉耕心夙涉宗教頗究出
世之略每念大道曠絕恒用太息今樂觀寺工之
成既揭其源流於石復以菩提向上之宗為主寺
者告盖低徊屬望者深矣若夫締造之艱土田之
數故河南巡撫錢敏肅公鼎銘舊記詳矣今既以
大法為重無事襲紀但宜列之碑陰俾方來者有

所考云

觀音律寺 在水門內古五神廟遺址寺中有毘盧閣載乾隆府志光緒十八年增建舍宇更為十方

禪林

龍華寺 在馬頭鎮乾隆年建

東觀音庵 在西埧鎮東南隅光緒十年鎮人公建

西觀音庵 在西埧鎮西段光緒十一年建

興隆禪院 在壽甯鄉墩藏道光年建

大悲庵 在漁溝鎮東陶家營始建未詳

三元宮 在老子山始建未詳

淮陰志徵訪稿

故事

二帝閣 在老子山始建未詳

三元宮 在澗橋鎮圩內香火地約五十畝有奇有僧人住持金董曹三姓公建年分未詳

金家老庵 在澗橋北有僧住持金姓始建

茶庵 在湯集東南蔣姓私建

湯家庵 在湯集東香火地約五百畝湯姓私建

三元宮 在馬頭鎮乾隆年建

月光庵 在王營鎮鹽河北岸乾隆年建

大仙堂 在草閘光緒年建

王家草廟 在三棵樹東道光年王姓私建年分未

詳

姬家庵 在三棵樹東姬姓私建年分未詳

陸家庵 在三棵樹王姓私建年分未詳

萬壽庵 在漁溝鎮東姓建未詳

白衣庵 在四坵道光年于姓私建

淮陰志徵訪稿

故事

雜事四 本類分子目四內方技見人物志今
惟輯志事釋道災祥三子目

志事一

鄉閭舊聞古稱志餘今府縣志並有雜記篇

光緒府

志卷三十九縣志卷二十六

所以網放失見治亂

雖事或奇俛而采風者不棄蓋鑑古鑑今之道路
略在是矣

淮陰侯有後其說初見於張大齡支離漫語舊志載
潘叔明之說詳矣後有大理寺司務錢塘趙時楫
言其鄉人吳思穆順治中為粵西縣令巡行山峽

淮陰志徵訪稿

故事

間見少年將軍廟像英風雅槩敬而拜之命工修
飾其堂廡即有土官率宗族百餘人稽首稱謝云
廟神即淮陰侯子因蕭相國托孤於南海尉趙佗
佗封之於此子孫繁衍自漢至今奉祀不絕因舉
相國與趙佗書及佗所賜敕諭以示吳吳甚以為
異歸而告人其言不妄是說與大齡之言相合邑
檢討張鴻烈官京師遇海澄余編修豔雪訪問此
事亦云韓侯之後韋土官在廣西地方與廣東接
境益信其說為有徵然兩廣土司韋姓甚衆毛初
晴蠻司合志所載在東蘭者有韋富撓在桂林古

田者有韋銀豹在永寧者有韋狼要韋朝義在義寧者有總管韋千里在馬平者有韋王朋等不知孰為侯後安得遍歷諸洞一詳訊之 見乾隆府志山陽潘叔明韓侯有後詩曰韓侯有後妄耶真海上今傳韋姓人萬里托孤書有淚千秋祚土鼎無塵朱虛侯起先鉏呂安樂公降竟續秦雄長一方仍世爵須知天不絕忠臣

淮陰侯死後不知窀穸何處今山西靈石縣有韓侯嶺嶺上有墓墓上有碑康熙庚午王學士頊齡自陝西典史回經侯墓下有詩云曾從淮市瞻遺廟

淮陰志徵訪稿

故事

又向汾山拜古坵伏膺不妨容惡少比肩偏是耻樊侯藏弓烹狗誠何恨食鄼封留亦已休惟有墓前三尺碣冷風淒雨自千秋又淮安崔國屏遊西安聞城東七八里有韓侯墓甚大親往拜之歸而告人其言甚詳是又一墓也果孰為侯藏魄之所哉

太平御覽所引書目有淮陰圖經經籍考有楚州圖經二卷陳振孫曰教授雪川吳萃商卿撰太守為毘陵錢之望大受時康熙十三年惜二書今皆不可見

洪澤湖濱舊有洪澤鎮又傳有洪澤村未之見也守
汛高良澗上者於康熙辛巳年五月二十日見西
南風驟起甚雨隨之湖波山立入申刻雨霽風止
虹見於東返照射湖鬚眉畢見有若帆檣數百艘
環水如城亘十餘里問之土人云此洪澤村也頃
歲尚有居民五十家以水避去水漫其上者二尺
意水落而村出耳踰年河防使者張公命汛貧刺
舟往探還言東西街道舊有千餘家十五年水漲
遂被淹沒今村基止沙灘一線高尺餘長七十餘
丈濶八九丈不等然則昔之所見正此地也

以上

淮陰志徵訪稿

故事

乾隆府志雜記

富陵湖漢富陵縣地光緒府志引明清河志云舊有
溝通淮今在治南隆慶以來淮水貫其中漁船大
小百餘隻每歲納科以備魚油翎膘之稅科額甚
微而湖村十倍知府薛斌復改科於里甲辦納招
來流亾聽民采獲為利甚溥明代以降塘堰不修
淮黃并灌遂與萬家泥墩諸湖滙洪澤而為一今
高家堰西吳城以南南極盱眙皆湖之故地 邑
人湯調鼎富陵湖詩云漢武秦皇久刮灰那知湖
市見蓬萊三山恍惚生鰲背百雉分明遶鹿胎水

墨雲中林壑翠霏微烟裏畫圖開地靈咫尺神仙
島金掌何須接露臺

宋景祐三年丙子六月丁巳次洪澤湖與劉春卿同
年黃孝恭相遇始識大理寺丞李惇裕洪澤巡檢
顏懷玉者錢思公在洛時故吏遂與四人夜飲五
鼓始罷明日食畢解舟以前晚入沙河乘月夜行

向山陽

歐陽修于役志

正統初黃河泛溢每水一斗其泥數升滙於清口而
為洲者十餘里運舟不通有司奏上征數郡人徒
疏浚久而弗集一夕衆見平江公擁騎從行水上

淮陰志徵訪稿

故事

若行工者然旦日沙徙水通運舟大利郡耆石士
寧等以狀聞詔如江西韋丹故事賜祠額春秋享

祭

見郡國利病書

乾隆十八年陝督尹公繼善移節治河清江時錢塘
表子才枚隱居江寧小倉山隨園公以書招之清
江子才呈詩並序以見志序云枚遁跡隨園塵思
久斷公手書招之令沈凡民苦加規戒類慈母之
投杼誤聞蜚語如良醫之下藥未切脉情恐愛之
過深而知之轉淺率爾言志請學仲由附詩四章
曰自愛清溪水最清忽聞老鳳喚流鶯商量江上

新行李檢點人間舊姓名殷浩何妨束高閣龐公
久已事躬耕夔龍簫管巢由唱請自分途慶太平
一笛斜陽萬木飛中年哀樂雪飄衣水邊花淡春
將暮山裏梁空燕獨歸卓氏酒壚三月斷鄂君翠
被十年違如何野草鴛鴦夢尚有襄王說是非每
望旌旗灑淚痕當初薦表苦推表想傳衣鉢終無
分賴有文章好報恩書卷一編常按日梅花三百
自成村他年李泌金鑾殿莫說陽城尚在門接得
郇公五色箋敢辭雙槳木蘭船蒼生望淺人難起
絳帳情深月再圓白下孤雲芳草渡龍門高浪夕

淮陰志徵訪稿

故事

陽天可憐桃李青青樹虛領春風十六年一見小
倉山房詩集卷十一留三日而南歸

道光十年琉球入貢道出清河縣

以下俱蔣培甦
餘隨筆原文

貢

使約數十人正使耳目官

一名都通官

名相國璧

副使正議大夫名王丕烈容貌衣冠略與中國同
言語亦無大異惟不辮髮耳本縣拜帖署云天朝
文林郎知清河縣事陶琨午拜 按乾隆癸丑琉
球入貢通事鄭文英道卒遂葬焉墓在今王家營
見古跡

鯨魚之名不見載籍今惠濟祠正殿懸其一肋長三

尺許相傳為道光中海潮所擁其事甚異河督麟慶記之曰南北兩尖之間為黃河入海尾閭東接大洋有巨魚焉每逢興浪阻遏河道觸網吞舟為民害僉患之因禱於天后乞賜驅除忽一日颶風大作雷鳴潮立擁魚來置海安廳龍神廟東沙灘上汛弁聞報往視見魚目新挾扶血淚盈眶自頭至尾量長十八丈高四丈魚仰望脊背隱隱露朱字有兵目梅永瀾者梯而觀之識其文曰此鯨魚一千二百年因傷生云云其下模糊不可辨於是海濱漁戶爭持刀鋸斃肉取油閱六七日始剔淨肋

淮陰志徵訪稿

故事

骨一具會風潮來又擁之去閱歲乙未余東巡海口汛弁舉骨呈驗並述顛末如此余甚感彰善瘴惡神之有靈而理之不爽也適重修清口惠濟祠告成因命載以柳船携至祠下與鐵鼓並垂不朽俾觀者群知靈異試思魚之肋骨三十有六此其一一肋如此其力可知乃桀驚不馴終遭誅殛維

神佑國感應如響可不知所警惕歟

今有碑在祠內

杜文正公受田清文宗傅也咸豐三年夏豐工漫口江淮流離七月文正奉使查辦振務次清江浦初九日以疾卒河督楊以增奏聞予祭葬優禮有加

咸豐四年秋上元梅伯言曾亮避難來清江河督
聊城楊公以增故與伯言為同年友留寓節署之
清宴園一伯言有詩記之曰見即開賓榻知君友
誼真殘生逗優渥高興撥悲辛意倦聊齊帙情忘
任吐茵夢魂安幕府飄撼尚江津一見柏槻山房
詩集卷二一明年七月乃盡哀伯言所為文校刊
之楊公為之序曰伯言同年以甲寅秋携家自王
墅移居興化又移居淮安乃得至清江而館余署
之清宴園以同年三十餘年之久經憂患之餘得
見而聚處朝夕不可謂非幸事矣伯言雖屢有遷

淮陰志徵訪稿

故事

徙詩文稿幸無遺失余亦曾錄有副本君寓居無
事頗復有刪益因校刊之以君今歲七十即以是
為壽下略一既成更為續刊詩集駢體文焉一伯
言作詩誌感云不計人非笑君深我自知為刊三
篋稿多愧百朋儀後息終誰勝吾生固有涯卻憐
文已倦只欲細論詩見詩續集卷二一十二月楊
公薨於署明年正月伯言亦卒據朱琦伯峴
山房集書後
吾邑雙烈祠祀提督陳振邦及妻吳氏舊志已載之
矣顧事實不詳山陽丁晏有鉄花行即詠其事序
曰陳提督振邦字鉄琴小字鉄兒安徽潁州人不

知誰氏子生而白皙美風儀冰清玉潤婉若處女
馴若書生十餘歲即嫻武略陷陣折衝所向無敵
天長總兵陳文勝故降賊也錄為養子遂冒陳姓
投李軍門世忠營歷功保副將嘗與應城陳將軍
國瑞對壘將軍敗鉄琴執旗大呼麾左右幾獲陳
益壯之後宛轉乞為義子陳將軍在淮安練兵演
陣余親見鉄琴白袷長衫朱纓繡帽如俊鶻摩霄
翩然攫擊天生之偉器也聘都司吳璜女授室結
褵宛然雙璧嗣鉄琴迫欲自裁飲阿芙蓉垂斃余
亟延醫以生鵝血灌甦旋復投劉軍門銘傳營攻

淮陰志徵訪稿

故事

剿捻賊累獲大捷升總兵以提督記名簡放賜黃
馬褂戊辰三月鉄琴過淮來謁余長跼執禮甚恭
時年二十有三余慰勉之是年五月於中途屯營
詢地名為陳家灘鉄琴心惡之猝遇賊隊中洋鎗
而殉李爵相奏請恩卹有加賻遺甚厚文勝利其
遺財必欲歸棺於皖其妻吳夫人以文勝非真舅
將大歸於淮文勝率兵卒奪棺以去吳夫人痛不
欲生時有遺腹妊身已六月為兵卒推撲墮胎即
時仰藥殉烈年甫十九悲哉適劉軍門至淮致祭
鉄琴聞之怒甚遂縛文勝於軍前數其掠貞婦養

贍之財絕忠將血嗣之罪斬首於市時人快之一
按吳夫人為淮之汙河村人振邦隨陳將軍駐汙
河夫人父與將軍結識遂以女妻振邦陳家灘在
河南滑縣陳文勝又名志明並見山陽丁壽祺陳
烈婦行序

七修類稿載淮安清江浦廠中草園地上有鉄錨數
箇高八九尺小亦三四尺不知何年物相傳永樂
間三保太監下海所造雨淋日炙無點髮之鏽望
之如銀鑄光澤壬申余在張灣城角亦見數具長

皆丈餘

山陽阮葵生茶餘客話

淮陰志徵訪稿

故事

釋道二

釋崇岳字圓明宋淮陰太甯寺山主與張耒諸父遊寺故湫隘崇岳至更構重堂以安雲水一耒為作記曰圓明岳師住淮陰之太寧寺其始至也牆屋圯毀佛事不嚴歲乃大飢寺田之人不足以給其衆圓明日夜剋苦菲薄率其徒為勞辱事完補葺治雖寒暑不休寺乃僅完余去太寧五年而再至入門視左右前後脫然疑非昔者視聽步履明潔安穩蓋易舊而新者十五六矣余勞圓明曰小邑民貧能勸相而成此未易也圓明曰自容而已未

淮陰志徵訪稿

故事

足道也佛之道先物而後已苦身而安人吾之僧堂卑陋敝惡不足以延四方之學者吾將易為重堂使容百人飲食寢處於前誦讀燕息於後而吾之居此可以無愧矣明年春堂成其周廣嚴好皆如其言而命余為之記下略一年七十餘耳目聰明筋肉強壯奉戒精苦禪誦不輟聞來自黃州歸欣然空所居而延焉日久相對久乃忘言

見丙子

志太寧寺注

釋玉琳武康人順治十五年召至京送居萬善殿賜號大覺禪師十七年秋復至京進號能仁國師康

熙十四年南游止於慈雲庵趺坐而逝世宗頒帑
勅建於乾隆四年告成是為慈雲寺

互詳陵墓

無住禪師長沙人學問淹貫兼通堪輿相人之術明
季舉進士知天下將亂易僧服清初至清江浦有
李姓者與之地而居之署曰折蘆閉門戒誦罕與
人事一日姚江同知高某來謁大相賞契請為弟
子於是無住禪師名播公卿間康熙四十六年聖
祖南巡召見賜名棲蘆寺

以上見咸豐縣志

釋萬清山陽人俗姓唐氏初為誕登寺住持康熙四
十四年聖祖仁皇帝南巡詔至揚州高旻寺應制

淮陰志徵訪稿

故事

和製詩欽賜誕登寺匾額御書果結菩提樹池分
阿耨泉對聯雍正十一年世宗憲皇帝特詔進京
於圓明園引見賜紫衣宸翰字幅對聯福字並命
修誕登寺勅建皖城投子寺即命為投子中興住
持乾隆元年奉旨諭河院高公斌安徽巡撫趙公
國麟同送入寺

釋大依字南安閩人初卓錫金陵攝山之棲霞寺後
來山陽住湖心亭之倚舟堂復居清江之檀度寺
餅鉢所至士夫莫不願從之游不妄作拈鎚豎佛
嚶語與會所至觸景吟詩托風旨於音響之外直

當與鐔津石門詩老並傳不僅以雕繪為能事也
所著集甚夥皆刊以行世弟子柴村名傳遐邇結
廬村墅名樹下居詩類其師尤善畫筆意蒼潤得
元四家意

以上乾隆府志原文

釋方智卓錫漁溝之延壽庵戒行甚高兼通詩詞晚
年靜修於揚州寶輪寺 邑人蔣堦有方公和尚
生傳云公姓王氏世本好道不近葷酒家於漁之
北鄉十歲時祝髮於其鄉之龍君廟法派屬海名
藏字方智幼而純篤嘗自言質魯讀儒書不慧及
長誦經文頗若有悟是殆有夙根也二十時持戒

淮陰志徵訪稿

故事

於揚州寶輪寺閉關三月聰悟頓開又叅禪於高
旻寺寺主篤愛之欲授以法屢強不可往來兩寺
者數年後與其同戒僧靜叅投京城萬壽寺師蓮
筏道濟遂授以法留之又不可自是歷遊五台九
華峨嵋天竺靈隱諸勝笠屐幾半天下矣三十時
忽歸鄉省母親鎮中關帝廟前戲台圯壞發願募
化獨力經理井井有條成復棄去鄉之人莫不高
其義焉如是往來南北者又數年年四十復來省
母母年已八十志欲終養適鎮北有延壽庵者原
名十家歲久壞鎮之薦紳吳公殿升發願興復邀

同鄉鄭公素涵等捐資重建於漁鎮之西公自督工披荆刈棘累甑疊瓦日則酷暑無蓋夜則露處無屋凡兩閱月成殿宇六楹於是有卓錫地遂奉母至院朝夕供養親為滌溺器理髮髻母以天年終然感吳公之厚德與諸檀越之情緣已無復去理矣公經營家事一如常人前後創造動經巨萬雖甚繁劇毫無匆遽接待賓客無貴賤皆平等容色和藹語言安慎見之者和風一吹熱惱自散其居處甚儉衲衣草履床不茵褥食惟蔬菜嘗謂僧家生前來歷淺今世福澤薄若再享用將召天

譴淡泊乃分也而性至慈人有索錢物者笑而授之四方行脚望風而歸遇之如家人禮飲食而外或給以衣履嗚呼可以風矣初劉子進南主講臨川書院院與梵刹毗連曲徑通焉余與吳子古音就劉結詩社推公為惠遠每會必繼以飲詩公年五十五六偶病風乃勸以酒不辭量甚洪進以巨觥亦不辭竟亦不醉即大醉神色仍如常也此殆所謂內天外人不定不亂者乎去年余復主講於此往來過從日數四每花晨月夕烹茶談禪余雖不甚解而理語如雪頗能發明心性與吾道相脗

合蓋其足寄塵中心遊世外二六時裏勤勤懇懇
將死生大事貼在額上故能不墮塵障如俗僧釀
錢肥橐作子孫業也公今年六十又七步履強健
猶四十餘人竊窺齒髮稍稍變矣居平嘗自慨曰
僧家學道不入深山與俗家相去幾希故知其久
有去志也前九月九日忽以家事屬其徒凡所手
勑皆筆諸書座客觀者瞭如指掌自後退暇密縫
衣履余笑謂曰公行當告我公曰唯唯又九月八
日治具邀飲情意肫然言色洒如也夜半行意始
露余登其床大笑曰公已告我矣余不悟耳問何

淮陰志徵訪稿

故事

往曰仍揚州寶輪寺也問何速曰將尋同戒靜叅
也諸徒子羅拜泣留但笑慰之勉以力修無一語
及他事天明將錢易酒家人報曰去已遠矣嗚呼
公智慧高超器量寬厚不質人短不炫己長處世
如虛舟之觸物行跡如浮雲之在天余嘆之羨之
思之悲之不知涕之何從也去之明日市中聞之
皆歎息泣下以不得一見為恨非公之盛德感人
何以及此若但謂割俗情慕高節稟剛毅之性有
堅忍之力猶恐未足知公云爾

釋廣達道光末居河堤之茶庵當南北孔道舊有石

馬頭中多斷續每雨泥淖沒踝廣達憫焉募資建
安涉橋自石馬頭至越堤互三年皆礮石治之旁
植石柱二十鑿鐙燃膏用照行者更建茶亭數楹
資行者憩焉凡十年而工舉

互詳丙子志卷三

淮陰志徵訪稿

故事

災祥三

明正德三年冬清河縣以上至宿遷縣一帶冰紋如花樹樓臺圖畫之狀

嘉靖四十年六月清河縣東南隅有雲氣如列城市宮殿狀甚奇偉

萬曆二十二年六七月大旱清桃亢暘

三十三年山鹽清桃自六月大旱三月顆粒不登

四十年四月清桃冰雹大如盃鉢地深五寸二麥盡

傷冬雷

四十三年秋山安清桃大水

淮陰志徵訪稿

故事

崇禎十七年清河縣有鳥群飛類鴿而小羽近白足如雞有毛人謂之番雞

清順治十八年清河縣有野彘入市

康熙二十二年五月清河縣人夜見有白氣數道如

虹而銳從月射出次日大雨雹靈百日

以上均據

乾隆府志補

咸豐七年六月蝗

據邑人王卓如枕雲居遺稿

光緒六年夏蝗

十四年大雨水

十五年春飢

二十三年六塘河溢

二十四年水

二十五年五月十七日夜隕星而雷

二十七年五月長星見西北

二十五年及此則俱見小方壺齋詩存

二十八年夏蝗入境

三十二年夏大雨水自五月二十八日至於八月不

止

三十三年春大飢流亡被野秋大疫

三十四年夏雨水傷禾

宣統元年夏彗星見六月至八月大雨水十一月地

淮陰志徵訪稿

故事

大震

二年水歲除大雷電

三年水秋桃有華

補遺

咸豐十年彗星見西方

光緒十年六月縣治西門外城河蝦忽放光游揚水

中歷歷可指觀者甚眾